

焦太史編輯國朝獻徵錄

焦太史編輯國朝獻徵錄卷之三目錄

戚畹

贈楊王陳公

贈徐王馬公

贈滁陽王郭公

彭城伯張杲

惠安伯張昇

會昌伯孫忠

錦衣指揮使孫璉

會昌侯孫銘

慶雲伯周能

瑞安侯王源

安仁伯王濬

壽寧侯張繼

慶陽伯夏儒

昌化伯仰林

安平侯方銳

指揮僉事黃琮

固安伯陳景行

武清伯李偉

西吳郎文暉

全校

吳興茅元儀

錢塘徐象榘刊行

焦太史編輯國朝獻徵錄卷之三

戚畹

贈楊王陳公神道碑

宋 濂

皇帝恭膺大寶式展孝思既追崇 祖宗四代帝號  
建立 太廟復念 皇太后之所自出追封外王父  
爲楊王外王母爲楊王夫人建祠於 太廟之東歲  
時遣重臣致祭近有來自淮陰者言王墓在盱眙如  
故 上聞之悲喜交集卽詔內臣及閭丘署令往祭  
而修治之置灑掃之戶凡三護視塋域且命詞臣撰  
文以樹諸神道 濂伏讀 御製王之行若曰王姓

陳氏世爲維揚人不知其諱當宋之季名隸尺籍伍符中從大將張世傑扈從祥興帝駐南海至元己卯春世傑與元兵戰師大潰士卒多溺死王舟亦爲風所破幸脫死達岸與一二同行者累石支破釜煮遺糧以療饑已而糧絕計無所出同行者曰我等自分必死聞觸巖山有死馬共烹食之縱死亦得爲飽鬼不識可乎王未及行疲極輒晝睡夢一白衣人來謂王曰汝慎勿食馬肉今夜有舟來共載也王以爲偶然未之深信俄又夢如初至夜將半夢中髣髴聞櫓聲有衣紫衣者以杖觸王之脰曰舟至矣柰何不起

王驚寤身忽在舟中見舊所事統領官時統領已降  
於元將元將畏舟壓凡有來附者擲棄水中統領憐  
王亟藏之皇板下日取乾餼從板隙投之王掬以食  
度王之渴乃與王約以足撼板王卽張口向隙受漿  
居數日事將洩皆彷徨不自安忽颶風吹舟盤旋如  
轉輪久不能進元將大恐徧求於禱祈者不可得統  
領知王能巫術遂白而出之仰天叩齒王若指魔鬼  
神狀風濤頓息元將喜因飲食之至通州賚王數鉅  
魚送之登岸王歸維揚不樂爲軍伍避去肝怡津里  
鎮擇地而居以巫術行王無子生二女長適季氏次

卽 皇太后晚以季氏長子爲後年九十九歲而薨  
遂葬焉今墓是已臣濂聞之君子之制行能感於人  
固難而能通於神明爲尤難今王當患難危急之時  
神假夢寐挾之以升舟非其精誠上通於天何以致  
神人之祐而至於斯也王之羣行其詳雖若不可知  
舉此而推之則其積德之深厚斷可信矣是宜慶鍾  
聖女誕育 皇上以啓 大明億萬年無疆之基於  
乎盛哉昔日史臣贊堯之德首以親九族爲言其效  
至於黎民於變時雍之盛然九族之中母族居其三  
皇上以念母之故思王不能忘封以王爵享以祠

廟今又樹碑墓道以紀其異行是皆以孝治天下也  
將見四方嚮風咸知以孝自勉皞皞熙熙臻夫隆平  
之治不難矣臣濂既序其事復再拜稽首而獻銘曰  
皇帝建國克展孝思疏封母族自親而推錫爵維揚  
地邇帝畿立廟崇祀玄冕袞衣痛念宅兆卜之何墟  
閭師來告今在盱眙皇親悅豫繼以涕洟卽詔禮官  
汝往葺治毋俾蕘暨跳踉以嬉惟我揚王昔隸戎麾  
律風蕩海糧絕阻饑天有顯相夢來紫衣挾以登舟  
神力所持易死爲生壽躋期頤積累深長未究厥施  
乃毓聖女茂衍皇支蘿圖坐開鴻祚茂親日照月臨



風行霆馳自流徂源功亦有歸無德弗酬曲禮可稽  
聿昭化原扶植政基以廣孝治以惇民彝津里之鎮  
王靈所依於昭萬年視此銘詩

贈徐王宿州馬公廟碑

陶凱

洪武四年夏六月丙申皇帝御皇宮門召禮部尚書臣陶凱諭之曰皇后父徐王馬氏世爲宿州人家閔子鄉新豐里王本民家素質朴以兄弟齒序人稱之曰馬某王少壯時膂力過人沈毅寡言笑重然諾而壯強剛疾惡見有爲不義者視之若仇讐然或少忤其意輒肆毆擊雖至死無所畏憚鄉人莫敢犯當元政失馭天下將亂王以忿爭殺人恐遠於法移家定遠及天下大亂乃挈皇后母避兵他所而以皇后託定遠郭氏俾育爲己女後郭氏首難自爲元帥收鄉

民兵朕亦爲部下士遂以皇后爲朕之配既定天下  
卽皇帝位皇后正位中宮封皇后父爲徐王母鄭氏  
爲徐王夫人以他無繼嗣因立廟於太廟之東歲時  
奉祭然稽諸典禮古無其義于是卽王所居鄉里闢  
地于塋封之南作新廟奉安神主每歲以春秋仲月  
俾有司祗奉祠事爾宜述其梗槩刻諸堅珉用垂不  
朽臣凱旣受明命竊惟人受天地之氣以生其得氣  
之厚而不薄者性必剛勇果毅然有不得志於當時  
而澤及於其後者必顯融光大此理勢之自然也今  
王有所抱負而無以發舒故常存疾惡之心其憤怒

所洩卽以加諸人蓋亦豪傑之士哉使遭逢盛際必  
能出將入相番名簡冊而乃生不逢辰至身歿之後  
以皇后父而得追崇王爵作廟故鄉使山川及觀井  
里增輝又豈非一出于天乎臣凱謹拜手頓首而爲  
之銘曰維此徐方代生異人乘時啓運蔚爲王臣惟  
王之生質性過厚不逢昌時深居猷畝王奮厥怒孔  
武有赫摧強折奸以輔弊則當元之季天下擾攘孳  
家避地東南其行英雄陸沈豪傑未起抱恨重泉吁  
嗟已矣山川炳靈遺德所鍾篤生聖女正位中宮皇  
帝仁聖爲天下父皇后孝慈爲天下母太姒嗣任則

百斯男聖子神孫累千萬年川原應應新廟奕奕與  
國同光末世無教

贈滁陽王定遠郭公廟碑

張來儀

洪武十六年十一月七日皇上親蒞滁陽王事實召太常寺丞臣張來儀諭之曰王之恩德注在朕心今滁有廟祀而碑刻未具甚闕典也汝其據此爲文於石臣來儀謹拜奉命謹按王諱子興姓郭氏其先曹州人王父少好術數常與異人遊得其書年長未娶南遊定遠邑人神其術將有爲叩之必驗邑中富翁家有處女以替木許嫁王父過其門翁以女命求卜數成曰此貴人也翁曰替木配王父曰翁能不鄙我乎則妻之翁曰諾旣而娶不數歲夫婦家贖生子三

女一王中子也始生父卜之喜謂人曰是兒得佳兆  
異日非常人必大吾家既長兄弟別籍三人皆善殖  
產元末民間有造言者王誤中其說信之甚篤忽不  
事作業而妄散家財陰結賓客至正壬辰汝穎兵起  
王識天下當變乃召所結賓客子弟拔濠梁據之時  
皇上潛住居民間爲譌言所逼懼禍將及挺身入濠  
梁抵其城爲門者所報將欲加害人以告王王親馳  
活之撫之麾下間召與語異之取爲親兵居數月王  
謂曰汝單居當爲汝婚王暮歸與夫人飲食語及斯  
事次夫人忽惋惜謂王曰方今兵亂正當收召豪傑

是子舉止異常若不撫於家而使爲他人之親是失  
智矣王悟遂以女妻孝慈皇后是也王爲人勇悍善  
戰時軍帥四人名位皆在王上王素剛直不屈人下  
每遇事四人瞋目語難而王剖決通敏數以非語侵  
之衆故含忿未幾客軍首帥彭趙以兵來駐滾二姓  
皆僭稱王王等遂爲所制一日衆挾趙勢拘王于獄  
將害之皇上自軍馳歸或曰勿往曰再生父母有難  
可不赴乎遂入王家明日彭帥聞遣人釋王以歸明  
年夏還故里收元卒七百獻王王就令將之又明年  
夏染末疾未差王聞元義兵欲歸將說之左右無可



使特過寢門示意趙起因請扶疾往卒說降之得其精卒三千既而彭趙東屯泗州因挾王以往時皇上方駐滁陽知衆不可共事獨堅守以待復遣人賂彭趙左右賂行王得縱歸滁陽王兵共四萬其麾下僅萬人皇上所部三萬有奇明年乙未王命守和陽既而信流言親至和陽視師值王警人亦駐其中聞王至移軍異處皇上禮送行者俄爲所難王聞驚得疾尋卒歸葬滁州夫人張氏生三子長戰歿次爲降人所陷幼與羣小陰謀伏罪次夫人張氏生女一爲妃生蜀王豫王如意王女二洪武元年天下旣一剖符

行封追思更生之恩寔帝業所始乃封滌陽王建廟  
墓陽命有司歲率滁人祭之臣來儀伏聞自古帝王  
之典雖受命于天未始不因乎人蓋必有所祐助維  
待之者亦得與以享其榮傳之無窮而施之罔極惟  
我皇上奮布衣提一劍而起外無尺上一民之助而  
王能脫危難識潛微納于貳室投以兵柄慨然不少  
吝惜遂肇大業可謂有知人之鑒矣及今大統既定  
四海一家推本尋源寔由于王爰建顯號俾永永血  
食益非王無以開萬世之業非皇上無以求王之名  
臣謹卽是爲銘銘曰皇受天命發跡濠梁方其始與

附于滌陽滌陽先知識聖於微聖有大難王脫其羈  
取被神龍翼之風雲浴日咸池滌其垢氛龍騰日升  
伊誰之功有相自天寔啓王衷皇奮無旅王命予之  
皇室未媿王命女之謀行諫從肝膽弗疑萋非之言  
終莫我離秉鉞專征付以闔外顛強蹙驕有衆日大  
變生于意卒疾于驚何啓其緒弗享其成皇明日昌  
既臣萬方剖符錫爵乃侯乃王爰念舊恩極天罔報  
一飯必酬矧有大造乃封大郡乃建廟庭乃復滌人  
護其園塋祠官孔嚴報祀春秋壘酒釀黍稷羊牛  
王其來歆母曰無後王女皇妃三王挺秀王支百世

王有廟祀禁焚者雄孰王之似小臣受詔作此銘詩  
勒著貞珉以永無期

特進榮祿大夫柱國彭城伯張公墓誌銘

楊士奇

張故歸德永城名家其先積善累仁世有紹續迨其  
高曾克而益弘高祖諱文銘妣宋氏曾祖諱景惠妣  
劉氏祖從義妣朱氏考諱麒洪武中仕至昭勇將軍  
指揮使未樂辛卯追封奉天朔運保義武臣特進榮  
祿大夫柱國彭城伯諡恭靖甲辰仍追封三代考妣  
皆進彭城侯及侯夫人恭靖爲人敦厚閭閻爽務義施  
德秉忠事上始終一心母仝氏累封彭城侯夫人恭  
儉慈仁言動率體內德之懿化成于家今太皇太后

母也恭靖子男女皆三公爲家子諱景儀狀豐偉篤  
實和易表裏不二旣冠時仁廟爲世子公奉命宿衛  
文廟靖難之師出公仗劍以從東取大寧還戰鄭村  
琪連大捷以功超授義勇中衛指揮同知遂授薊州  
敗遼東軍之攻薊州者追奔至榆口而還自是侍衛  
守北京南軍圍城公旦暮效力其間永樂二年以功  
陞本衛指揮使三年調金吾右衛五年調錦衣衛十  
四年調府軍右衛二十二年陞中軍都督府左都督  
是歲冬命爲奉天翊衛宣力武臣特進榮祿大夫柱  
國彭城伯食祿一千五百石子孫世襲明年侍衛宣

廟謁孝陵歸奉命總督操練右哨軍馬正統元年患  
痺疾上遣太醫院官督醫視療竟以不起三年六月  
三日也春秋六十有五公平居孝於父母友愛諸弟  
祗事四聖小心恭恪以勲以戚爵位累加禮遇之隆  
錫賚之厚執謙秉和居靜守約循禮奉法深戒滿盈  
家庭中外以清以肅故其薨也計聞特遣中官監視  
喪事命禮部賜祭工部賜賻營葬葬以薨之歲某月  
日墓在某縣某鄉某原其配宋氏累封伯夫人子男  
八人長輔次輅府軍右衛指揮使先卒輓越府羣牧  
千戶軌越府典寶軾襄府羣牧千戶輒軒轅女二人

孫男女三人自古外戚有賢有否賢者克保富貴延  
被子孫否則不旋踵而傾復隨之固在上者失馭之  
之道也我國家自洪武末樂以來致厚戚里親之以  
恩約之以禮如張公者既藉累世之德善又修恭儉  
之行斯其家之興所以愈久而愈盛者歟



特進榮祿大夫柱國惠安伯永城張公壙誌

公諱昇字叔暉今太皇太后季兄也世居河南永城  
高祖文銘曾祖景惠祖從義世以積善相承考麒以  
勲戚任指揮使追封彭城侯妣仝氏封侯夫人三代  
祖考皆追封彭城侯妣皆追封夫人伯兄果襲彭城  
伯卒子再襲仲兄旭府軍衛指揮使公初以城守功  
授義勇衛正千戶永樂三年陞羽林前衛指揮僉事  
調府軍衛七年授誥封昭勇將軍十二年隨駕北征  
二十二年陞後軍都督同知洪熙元年陞左都督宣  
德元年宣宗皇帝征武定州三年巡邊俱命分守北

京四年上優禮至親命輟左府事朔望奉朝請凡朝廷有大政事亦預議後奉太皇太后命弗預正統五年封惠安伯授奉天翊衛宣力武臣特進榮祿大夫柱國歲祿米一千一百石賜誥券子孫世襲六年正月十三日以疾卒壽六十有三計聞上深嗟悼輟視朝一日遣官諭祭勅有司賻葬太皇太后遣官致祭以是年二月某日葬宛平壽安山先塋之次公爲人端重孝友之德夙著于家閨門整肅教諸子有方平居簡默臨事卓有定見歷事四朝公勤忠謹未嘗有過宣廟爲皇太孫時往來兩京及隨侍太宗文皇帝

北征背命公保衛出入起居深有規益退而未嘗形於言宣廟以保衛功嘗欲加封爵固辭其居顯官恒自謙抑每陞拜祗畏如不勝其臨政事必咨詢同官審擇而行不恃已其與人交尚道義遇文學士必加禮敬服食尚儉素絕無富貴態而急於利人常施藥石以療人疾爲糜粥以濟饑者公少畱心載籍至老不倦往古見及忠臣孝子端人正士每遇事輒以訓諸子偶燕居諸子侍適雷雨暴至公肅然曰語云迅雷風烈必變學者不可不慎臨終召諸子語之曰吾素無功德朝廷篤念親親與以高官一家糜食莫能

報稱喪事不可干朝廷宜從節儉依文公家禮無作  
佛事無徇世俗爲葬儀費財勞人無久停柩于家毋  
煩費親戚朋友葬宜深坎毋高爲墳塋吾所注意者  
不幸長子蚤喪孤孫數人諸子宜加保愛爾等能體  
我心則爲孝配王氏封夫人子男六長軫襄府典寶  
次軾次輪府軍左衛指揮使次輅次軫次軫軾輅先  
卒嗚呼前代勲戚賢否得失具載信史世爲勸懲若  
公者可謂生願死安生榮死哀者矣雖沒以中壽而  
不亡者遠爰述其槩用納諸壙以示永久云

特進榮祿大夫柱國會昌伯太傅安國公謚恭

憲孫公神道碑

李賢

我國家制度文爲迥超前古凡勲舊大臣生榮歿哀之禮務極詳備至於外戚之賢者待之尤極其厚蓋天理人情之至誠不可得已者然亦不多見焉今見太傅安國孫恭憲公一人而已公聖烈慈壽皇太后之父也距堯已八年而夫人董氏卒訃聞官庭哀悼上輟視朝一日凡白金寶鑑布帛之類祭葬之禮率異常例旣表事復命臣賢爲撰合葬神道碑銘用昭公與夫人善行干來世嗚呼休哉公諱忠字主敬姓

孫氏世家濟南之鄒平高祖而上代有顯宦曾祖復  
初父仕英俱不仕以公貴皆追封會昌伯曾祖妣張  
氏祖妣高氏俱贈夫人妣丁氏封太夫人公自幼端  
重祖父母尤鍾愛之嘗相謂曰此兒風骨不凡必大  
吾門者惜吾輩不及見也一日忽患疾腫氣塞舉家  
驚救無措是夜父夢神人曰上帝鑒汝陰德命吾醫  
汝兒汝母恐覺聞公口果有藥香病遂愈嘗與里中  
羣兒嬉戲公獨自重餘皆呼阿擁護見者異之曰此  
貴兆也稍長知向學乃選入邑庠卽力學不息久之  
入貢太學聞見益廣洪武己卯擢山西介休簿邑素

號難治令丞已爲豪橫所梗公至凡不率者悉置諸  
法不旬日政聲振尋以外難去服闋調河南永城時  
營造天壽山陵寢公率邑夫赴工撫恤惟周他邑夫  
多亾去公所部者俱存督理總戎嘉其能召與計事  
凡所需悉以委公事竣內補鴻臚序班時宣廟爲太  
皇孫將議婚仁宗昭皇后之母太夫人知公第四女  
有淑德太宗文皇帝特遣彭城伯張杲奉太夫人之  
末城選至京立爲皇太孫妃洎宣廟踐祚冊爲貴妃  
陞公驃騎將軍中軍都督府都督僉事賜宴并錦袍  
犀帶宣德丁未今上皇帝誕生冊貴妃爲皇后越三

年進封公推誠宣忠翊運武臣特進榮祿大夫柱國  
會昌伯食祿千石子孫世襲復賜誥券追封三代遺  
公還家燎黃以中官隨仍幸其第慰問甚至未幾太  
夫人卒公乞奔喪復遣中官督葬事又嘗念公居第  
湫隘欲命工撤而新之公懇辭曰自臣視之已爲寬  
矣勞人費財非臣所安也遂止公嘗語諸子曰吾家  
幸居戚里富貴已極爾等宜知止足庶可以保名位  
諸子奉教惟謹公天性樂善好義鄉人有鰥而請成  
者周之不倦及卒葬以地有罷職而不能舉喪者助  
之棺衾而恤其家有受誣而請戍者力爲伸雪薦用



之有左遷窮廣囊無一錢者贖以金有坐受賂而貧  
無貸者爲償以其數有遺女無依者備粧奩以嫁有  
罷爵無腴田者推以與之有蒼頭詐取人財者代償  
而遣之歸凡善行不可勝紀忽疾作朝廷命醫往治  
不效疾亟謂子曰吾起寒微不自意如媿戚畹身都  
顯爵實在望外奈何起家難保家不易汝輩勉之言  
畢而逝在景泰三年九月十七日距生洪武元年七  
月三日享年八十有五朝廷聞訃有司營葬于宛  
平縣西香山之原追封會昌侯謚康靖天順改元皇  
上復位首念公復追封奉天佐理推誠宣力武臣特

進光祿大夫右柱國太傅安國公改謚恭憲太夫人  
董氏加封安國夫人夫人諱元貞公同邑人父彥恭  
母齊氏皆邑之好善家夫人自幼莊重寡言既笄歸  
公閭家宜之及公爲邑庠生夫人同其清苦佐以勤  
儉公歷邑簿夫人與俱凡服御如韋布妻未嘗有所  
增益有饋物者必嚴拒之用是公有永藥聲而夫人  
家範益肅旣封夫人常被召入內小心慎密未嘗一  
語及外事出則未嘗一語及內事雖賚與駢蕃若不  
與者凡公濟貧恤孤施予之際夫人未嘗不極力贊  
之至于兩嫁孤女夫人之力尤多而待媼族御僮婢

一於恩惠每遇歲時集子孫於前諄諄戒諭謂貴而能謙富而好禮乃處已良法公沒有欲以烈禍中公家者事勢恟恟夫人教諸子靜以守之卒消其變天順以來夫人壽益高福益備子孫益盛而朝廷篤念外戚之意益厚一門榮顯前代無比已而遘疾上命醫往治遣中官問安相屬於道既愈復作至彌留乃召諸子囑之與公治命一同夫人生于洪武二年七月十七日卒天順四年四月四日享年九十有二卜以是歲五月十五日啓公窆而合葬焉子男五人長繼宗會昌伯以翊戴功封侯次紹宗顯宗俱都指揮

同知次續宗都指揮僉事次純宗錦衣衛指揮僉事  
女九人皇太后居四

昭勇將軍錦衣衛指揮使孫公墓誌銘

程敏政

公諱璉字國用姓孫氏濟南鄒平人孫氏自故安國  
恭憲公以宣宗章皇后之父顯其子今太傅會昌  
侯繼之歸然國之元舅胤系日蕃家法滋備若公  
亦可謂稱其家兒者矣然壽不逮其得君子惜之公  
生而淳謹不與諸貴游相將恭憲公鍾愛之諭今太  
傅曰此子必克荷吾門宜善視之稍長出就外傳過  
經史大義學詞翰皆有可觀雅嗜古名賢書畫及山  
石花竹之勝以自適凡聲色寶玩若不介意今太傅

既嗣伯爵天順初以翼戴功進封侯公遂以世嫡嗣太傅之舊官爲錦衣衛指揮使雖貴富而所處益謙無一毫侈倨之態今太傅總五軍幾二十年公長贊畫其間戲下之人多以濟而綜理家政尤克當太傅之心內外僮僕咸職其職而不敢肆與二兄瓚珍及羣從極親友歲時設燕奉諸父于堂以次稱壽驩如也諸勲戚家以爲美譚一或有不睦者卽相率以孫氏諭之公居母夫人丁氏喪哀毀甚或勸止之曰太傅春秋高二兄方有事西南夷自愛公泣謝曰惟送死可以當大事執禮彌篤卒襄事得孱疾幾數載弗

愈恐貽父兄憂恒勉強若無疾迨疾革惟對人垂泣  
以弗獲終養爲恨諭其子曰孝事吾親勤學以無玷  
先範吾目瞑矣成化丁酉三月二十二日竟不起得  
年三十有六配蔣氏定西侯貴之孫先公沒繼湯氏  
叅將胤勛之女俱封淑人子一人鎮異日當嗣侯者  
張氏其生母也

太保會昌侯孫公神道碑

毛澄撰

正德庚辰三月二十四日太保會昌侯孫公銘卒于位 上聞之悼惜輟視朝一日諭祭十有四壇賜齋糧麻布各若干命有司營葬域如制於乎 朝廷眷

念勲戚老成之臣恩禮所加可謂至矣然非公忠勤素著上結主知亦何以得此哉公諱銘字日新世家山東濟南之鄒平曾祖諱忠由國子生歷任河南永城縣丞篤生淑女簡入爲 宣宗章皇帝妃累官中軍都督僉事 英廟登極以誕育恩封推誠宣忠朝運武臣特進榮祿大夫柱國太保會昌伯年九十三



終贈太師安國公謚康靖配董氏封伯夫人祖諱繼  
宗襲伯爵南城翊戴 英宗復辟進封會昌侯命總  
督五軍營掌後軍都督府事凡遇 經筵侍班國有  
大事與會議我 朝外戚不預政繼宗以勲德特命  
之時以爲鮮 憲宗朝監修國史書成加太傅沒贈  
邦國公謚榮襄配丁氏封侯夫人父諱璉錦衣衛指  
揮使未襲爵卒追封會昌侯配蔣氏定西侯琬之女  
繼湯氏信國公之孫女生母張氏錦衣千戶貴之女  
俱封侯夫人公以成化庚子襲祖爵自幼莊重沈毅  
脫去綺紈之習嗜讀小學武書習射藝天性甚孝每

痛父早逝思慕至廢寢食事母敬養備至後請於朝  
賜 誥褒贈其心始慰曰人子之至願庶其少遂乎  
立身嚴慎處事詳審雖居勲戚而不改儒素之風尚  
禮敬賢人多稱之累命冊封親藩餽遺一無所受歲  
時遣祀陵必敬以將事癸卯兵部推公管理三千營  
弘治辛酉遷五軍營轉耀武管甲子兼理礮忠孝義  
二營正德紀元改坐奮武營尋掌府軍前衛事己巳  
薦提督神機營軍務僉後軍都督府事西夏平以功  
加大保賜金牌綵幣公歷典兵戎克修厥職軍士畏  
威懷德退無間言而騎射閑熟一時武臣尤爲稱首

先帝嘗御大內演武公以技能稱上意賜蟒衣寶鈔  
命掌右軍都督府事轉中軍都督府正德末 上北  
巡南征公總營務乃與文武重臣同心協議晝夜憂  
勤保固京師中外倚重竟以勞瘁成疾不起屬纊之  
際屬其子臬曰予德薄官以世爵兼太保名位已極  
恨無以報國恩身後勿請謚贈以重予答臬遵其言  
公生於天順甲申三月七日享年五十有九配汪氏  
戚畹都督英之女繼王氏嘉善大長公主之女俱封  
侯夫人子男一卽臬承世爵才畧有父風娶顧氏鎮  
遠侯溥之女

追封慶雲侯周公神道碑銘

公諱能字廷舉姓周氏世家昌平文寧村之柈林系  
出漢太尉勃後有諱惠達者仕後周爲尚書僕射徙  
順天章武子孫遂居此歷隋唐五代世多顯宦至元  
季兵擾家漸中微及公大父諱得清父諱福山皆以  
隱德高于鄉祖妣杜氏妣郭氏並有淑德公生而莊  
重雅不與羣兒戲大父奇之每語人曰昌吾家者必  
此子也嘗教公曰生人之業儒爲上農次之商賈非  
所事也公受教惟謹大父卒居喪盡哀稍長讀書植  
行事父母以孝聞待宗族有恩意治家男耕女織不

事浮靡遂致家日以裕性喜周貧恤困人有急赴之  
惟恐不及有所貸不較其償子弟有事漁獵者禁止  
之不欲以口腹傷物命其樂義好善類如此故鄉人  
稱爲長者焉元配甄氏同邑右族淑慧孝敬諳女戒  
凡事舅姑奉祭祀待賓客莫不各臻於道人稱爲賢  
婦馬生女二 皇太后乃夫人第二女也夫人一夕  
夢月光屬懷有娠其年蠶大登公與夫人曰此天賜  
也不可私乃均惠鄉族旣而卜之得女貴之祥甫十  
月 皇太后誕生異香滿室公心私喜比長容德殊  
盛宣德甲寅 誠孝昭皇后聞之遣使禮聘教習宮

中詩書涉獵禮度熟閑正統甲子 英廟議婚進爲

貴嬪 上生遂冊爲貴妃天順改元 英廟光復寶

祚召見公于便殿擢拜錦衣賜資金幣遣中貴送至

家自是恩數日益優渥馬甄夫人卒繼室高氏亦有

賢行生子二長卽壽次或公構疾卧床 上命醫來

視遣內臣問安否巷道相觸且給藥餌之需公度不

可起召語諸子曰吾荷 國厚恩無以報汝等當竭

忠守分毋驕奢淫縱以重吾不德言訖而逝計聞

上傷悼之賻贈有加仍命內臣出喪事合葬甄夫人

墓公生洪武三十一年十月十九日卒天順七年正

月十九日享年六十有六天順八年春 今上卽位  
尊 聖母爲皇太后陞壽驃騎將軍左軍都督僉事  
贈公及祖考如其官祖妣妣暨甄高二氏皆贈封夫  
人尋命內官監爲壽治第于京師復撤新柳林故居  
成化改元加壽榮祿大夫都督同知瓊拜錦衣衛千  
戶三年冬進壽慶雲伯 賜階推誠宣忠翊運武臣  
特進榮祿大夫柱國食祿千石子孫世襲給誥券追  
封公慶雲侯祖及考如之甄高二氏並進侯夫人祖  
妣妣亦如之瓊陞指揮僉事恩禮繁縟滂洽存沒於  
乎盛矣是固 皇上體念 慈極深恩推其本原以

及其所自出用致始終眷厚如此要亦公之祖父蓄  
德深厚肇開慶源及公之身又能好義樂善以擴前  
人道德至於克積溥博不可遏已故乃篤生 聖母  
迓承天休光輝發越垂于子孫演及無窮夫豈偶然  
之故哉



明故太傅瑞安侯贈太師謚榮靖王公墓誌銘

賈宏

太傅瑞安侯王公以嘉靖甲申五月二十六日卒于京師之賜第上聞訃震悼輟視朝一日贈公太師謚榮靖命禮部諭祭工部治葬皆如制又以布粟賻之公諱源字宗本別號觀淵其先世居密雲曾祖諱福洪武初歸附以軍功授密雲中衛百戶福長子壽以父戰歿襲陞義勇某衛千戶而其弟諱鳳因占籍應天之上元公祖也鳳子五人其次二諱鏗是爲公父娶段氏生女上僇憲祖爲孝貞純皇后以恩澤

累陟中軍都督而段封夫人公爲 純皇后長弟性  
淳厚自少以禮自持成化甲午都督公旣沒遂授錦  
衣衛都指揮使壬寅陞中軍都督府同知甲辰封瑞  
安伯號推誠宣力武臣階榮祿大夫勲柱國歲祿千  
石弘治戊申 孝宗敬皇帝以恭上 聖母尊號爲  
皇太后推恩舅氏益祿百石越五年壬子進封爲侯  
更號奉天翊運推誠佐理武臣階特進光祿大夫益  
祿三百石錫誥券子孫世襲追封其父阜國公母阜  
國大夫人曾祖祖之贈皆如公之爵邑曾祖妣高氏  
祖妣某氏皆侯夫人癸亥加太保乙丑 武宗毅皇

帝以恭上 聖祖母尊號爲太皇太后思加太傅又  
益祿三百石正德戊寅以太皇太后薨又益祿三十  
石蓋自荷爵命寵錫駢蕃昆季子姓重圭疊組可謂  
極一時之盛矣而公以恬淡處之服膳與馬不爲侈  
靡田宅自賜予之外未嘗妄有所干常以恭慎率其  
家人戒飭僕御無得與細民爭利其賢聲藹然著于  
縉紳之間而其居家又甚孝友恨阜國早棄策養事  
太夫人務盡其歡與其弟崇善伯清安仁伯濟手足  
之情甚篤太夫人之未老也一錢尺帛必其手出室  
無私藏視羣從類於已子鄉黨姻友不敢以貴富加

之雅好書史喜吟味風晨月夕徃徃延賢士大夫賦  
詩飲酒爲樂葢戚里之好德而文者也故其卒也知  
者莫不惜焉公生於天順戊寅五月三十日享年六  
十有七配柳氏安遠侯浦女繼孫氏錦衣千戶瑀女  
皆封侯夫人子男三長卽橋嗣侯者也好學親賢可  
繼公美娶馬氏駙馬都尉誠女繼張氏錦衣指揮岳  
女次欄次相俱錦衣百戶女二長適定西侯蔣壑次  
尚幼孫男二曰炳曰煒嗚呼自古外戚之家席椒房  
之寵欲壓氣盛鮮有不驕奢淫泆以干撓國憲而止  
爲后德之累者所謂其居使之然也惟我 純皇后

以樛木之仁衍螽斯之慶其有功於廟社蓋與周之  
姒妣同而不私外家志存檢抑又遠過於漢之明德  
唐之文德故禮讓之化行于戚屬不戒以孚如公爲  
貴介弟乃能持盈守謙深自降抑無一毫憑藉之態  
歷事 四帝有譽重而無訾毀論者蓋以樊宏陰謀  
擬之於是益足以彰 純皇后之德之盛銘以著之  
豈不宜哉

安仁伯王公墓誌銘

楊廷和

公姓王氏諱濬字禹勳 太皇太后之季弟也正德  
二年十月中 皇上念公二兄皆有封爵而公獨無  
特詔封安仁伯於是其母 國太夫人尚在春秋八  
十有六日隨二兄奉觴爲壽公卿以下交賀之每朝  
下則兄弟三人錦袍玉帶鳴騶載道馬行而歸羣從  
子弟又皆有仕籍於朝戚里之榮近世所未有也無  
何公以暴疾卒訃聞 太皇太后愴悼不已亟遣中  
貴人往吊并賜白金彩幣等物 皇上亦遣使以白  
金百兩彩幣四表裏寶劍二萬緡卽賜其家命禮部

論祭者十六工部治喪仍給米五十石布五十疋爲  
賻公之先南京上元縣人高祖諱玉贈都督同知曾  
祖諱福祖諱鳳俱贈瑞安侯父諱鎮追封國公謚康  
穆母段氏封阜國太夫人伯兄源太傅瑞安侯仲兄  
清太保崇善伯公以成化壬寅授錦衣衛百戶弘治  
庚戌陞千戶壬子遷指揮使乙卯晉都督同知明年  
轉右 今上卽位之元年轉左又明年乃受封伯爵  
公性明達年十一失怙二兄教之讀書史講親身治  
家之道旣長孝謹循理與人交退讓不挾駁則從賢  
工大夫飲酒賦詩爲樂時時約束舍人輩遵奉家法

或有假聲勢以張皇於外者必痛懲之不恕戚里中  
以爲賢夫人薛氏末順伯之妹生丈夫子四人長桓  
公卒後一月自錦衣正千戶襲封安仁伯次禕官桓  
之初次楷次模俱百戶孫男一人尚幼桓所生也公  
之卒以正德二年十一月二十八日距其生天順甲  
申十一月十三日得年四十有四



推誠宣力翊運武臣特進光祿大夫柱國壽寧  
侯贈太保追封昌國公諡莊肅張公墓誌銘

丘 濬

弘治壬子秋八月十一日壽寧侯張公卒于位 皇  
上聞訃震悼不已輟視朝一日 命中貴治喪事有  
司營葬具屢遣官諭祭特 勅加贈太保追封昌國  
公諡莊肅乃以是歲 月日窆于宛平縣香山鄉翠  
微山之原其兆域蓋奉 詔新卜者也先期治喪事  
司禮監太監李公榮御用監太監秦公德以故事墓  
必有碑有誌聞于 朝公之冢子鶴齡以學士李君

東陽所述事狀屬于銘公之墓按狀公諱巒字來瞻其先河南人也後徙山西之徐溝又徙河間興濟故今爲畿內人曾祖諱希信隱德弗耀祖諱迪夔州府知事考諱綬鄉稱善人俱贈壽寧侯公生而穎秀天資開敏兒時應對賓客有成人風甫成童卽知嚮學伯父縉以儒起家教諭交城公偕其從兄岐親受其家教前後爲邑庠生岐登進士第累官至都御史公思齊其兄益加奮勵期以世科相繼然而累試輒負屈稱成化壬寅不得已始循例于大學然其決科之志弗得弗已也歲丁未今上皇帝在東宮憲宗

皇帝下詔中外選婚時 聖后生十七年矣遂應選  
爲 皇太子妃特授公鴻臚寺卿明年 上登極冊  
立 中宮超拜公榮祿大夫中軍都督府都督同知  
庚戌封推誠宣力武臣榮祿大夫柱國壽寧伯歲祿  
千石贈三代辛亥 皇太子生明年詔建 儲進封  
壽寧侯號加翊運二字階加特進光祿大夫餘如故  
祿加二百石仍贈其三代賜誥券子孫世襲公出自  
儒家一旦承先世積慶之餘篤生 聖后母儀天下  
誕育 儲君綿 宗社萬年之祚有功於 國家甚  
大是以榮恩侈賜重臻疊降金衣玉食良田甲第錫

予駢蕃天下之人得於見聞者莫不讚歎稱羨以爲  
當然公畧不改其儒素使者及門稽首拜嘉什藏惟  
謹曰天下之寶當爲天下珍茲吾家起儒畋一旦托  
肺腑荷 恩非常非但當爲 國家惜財亦不可不  
爲子孫惜福也寧藏於無用不敢用以匪彝况吾世  
業詩書豈可侈然溷於富貴而忘吾世守哉士大夫  
聞其言咸服其有遠識方幸公列爵武胄中資其清  
慎儉約以漸染乎勲戚之家使之有所矜式不幸不  
及下壽居然不起嗚呼惜哉公配金氏封壽寧侯夫  
人子二人長鶴齡聘 嘉善大長公主女王氏次廷

齡尚幼張巒與濟人 孝康皇后父也成化中 皇  
后爲東宮妃授巒鴻臚寺卿弘治三年陞督府同知  
是年冬封壽寧伯食祿千石與世券五年立 東宮  
巒得進侯加祿二百石是秋卒贈太保昌國公謚莊  
肅巒本儒家從兄岐舉進士爲按察司副使以戚恩  
召入臺爲僉都御史言官交劾岐岐亦有吏才巒子  
鶴齡是年嗣侯十六年秋太監李榮傳旨加太保增  
歲祿正德中進太傅嘉靖二年三月加太師又加祿  
三百石是秋以定策功進封昌國公鶴齡弟延齡弘  
治八年以都督同知封建昌伯食祿千石與世券十

六年進侯加太保祿六百石嘉靖初加太傅祿一  
石嘉靖八年盡革外戚封不得世嗣二張亦在革中  
未幾小張坐法并大張逮獄幾滅族矣自古外戚貴  
盛莫如西漢憐禍亦莫如西漢如衛青以奴產子數  
年父子四封侯又二十四年子孫遂無噍類然竊漢  
龜鼎者竟外戚也我朝 孝慈馬后有賢德兵亂外  
家無存者父馬公追封徐王歲時祀 仁孝徐后中  
山王長女本功臣家無封爵其餘官止都督至稱舅  
氏有封爵外戚封不俟繼世寔始於秦陵秦陵時二  
張甚橫時時入禁中內臣何文鼎素忠直二張寧窺

御帷文鼎持大瓜箒之幾死泰陵亦不罪文鼎當是時二張奪民田廬請官寺舍又豪奴姻親凌官府篡獄囚莫敢詰金玉積如山不厭市津壘斷徃徃皆二張人揚州府同知葉元嘗辱張僕人元至京羣僕入吏部撲元尚書馬文昇護元得免言官時論劾朝廷亦不問近世外戚莫橫於二張至正德時稍稍輯歛乃嘉靖以來益戢戢自謹大張雖以定策功封公然亦不敢視邵蔣務謙退自保尚書胡世寧上言宜保全外戚不宜使後世謂外戚封公自陛下始顧二張內倚昭聖外多取儻嗜利之人奔走其門生長

短朝廷頗疑二張奸徒劉東山遂奏二張有逆謀朝廷遂決意考問薄昭故事有旨會法司多官議衆亦恐傷 太后意又其事無踪跡且皆先朝事奏從未減 上不喜延齡坐斬鶴齡與南京錦衣指揮閔住延齡又有詞刑書聶賢等稍爲開釋 上怒停刑書俸一年司官下詔獄錦衣衛都指揮王佐力爲推鞠反坐東山等重罪下法司唐龍王相屠僑等言東山情罪深重竟荷校死鶴齡子宗說延齡子宗儉調南京盡沒賜產延齡繫御史獄嘉靖二十五年死於西



榮祿大夫柱國慶陽伯一中夏公墓誌銘

新貴

正德十年乙亥夏四月三十日慶陽伯夏公卒于家  
訃聞皇上震悼命禮部諭祭工部營葬事皆如制中  
宮遣中官致香幣楮鏹奠于賜第慈聖康壽太皇太  
若皆有奠賻公卿大夫以下咸往弔其子錦衣衛指揮使助等將以冬十二月十五日葬公都城南魏村  
社之原先期以左春坊左中允兼翰林院修撰劉君  
龍狀衰經過予請銘按狀公姓夏氏諱儒字宗魯別  
號一中其先應天府上元縣人永樂間北徙順天府

大興縣因家馬曾祖彥廣祖棨宗考瑄皆贈推誠宣  
力武臣榮祿大夫柱國慶陽伯曾祖妣姚氏祖妣廖  
氏妣郭氏俱贈夫人夏氏故名族望于南都累世隱  
弗耀業嘗中落至公父贈慶陽伯力勤崇儉再興有  
家俗習侈糜屏絕不問獨好義于媼親族舊有無共  
之族子嘗競產亦遜與之不較聞殍死及無告者買  
棺掩骼爲之惟恐後然不以要譽沽名鄉稱厚德長  
者必首推焉公資稟淳厚旣與人殊又濡染家訓動  
以勤儉忠厚爲尚且涉獵書史所與游多一時聞人  
名士非其人不交天性尤孝事父母能以色養父寢

疾幾三年躬侍湯藥旦暮不離左右夜則焚香願天  
莫以身代一日忽有異香至其拜所疾亦少間人率  
以爲孝感所致天鑒厥祥篤生聖女聖上仰作之初  
慎選淑媛以母天下乃以冊寶立爲皇太后於是夏  
之宗一旦赫然光大矣公初授中軍都督府都督同  
知無何進封推誠宣力武臣榮祿大夫柱國慶陽伯  
食祿一千石賜之誥券長于助錦衣衛指揮使次子  
臣錦衣衛指揮同知並授金紫其餘婦戚拜官有差  
又賜甲第一區腴田若干頃及蟒衣玉帶諸物皆異  
數云公感激遭遇益敦謙慎事事務循禮薄以自奉

服食不改其素朝請暇未嘗輕出戶庭子弟臧護告  
誠惟謹凡厲民踰節之事一切不爲京師京外若不  
知其爲外戚家者縉紳卒然遇之不問亦不知其爲  
慶陽狀稱公持德秉禮履盛滿而能仰體德意不驕  
不縱於我皇上聖治有光焉其信然哉公晚得末疾  
踰二年至是卒距生成化丁亥正月十二日壽四十  
有九配葉氏亦名族女懿行純至與公媿德封夫人  
子男三人長卽助次卽臣次勳尚幼女三人其二適  
魏國公孫徐鵬舉壽寧侯子錦衣衛都指揮使張宗  
說孫女二人予嘗與公同朝數接談見其體幹魁梧

言動簡重意當登上壽享景福而不意止此心竊異  
之然姻聯帝室爲國元舅身名俱榮子孫並顯正數  
令終天之所以篤厚者亦多矣又奚憾哉

贈特進榮祿大夫柱國昌化伯邵公神道碑

嚴高

聖天子弘化中典因心篤孝蓋嘗仰體皇考獻皇帝  
追本之意以遵奉聖祖母皇太后者無所不至又推  
太皇太后所自出凡褒卹典禮循先朝待外戚故事  
而行者亦無所不至故昌化伯邵公暨夫人楊氏定  
維太皇太后之考妣也先是公與夫人俱早逝權厝  
於錢塘北山之青芝塢乃嘉靖乙亥公之孫錦衣指  
揮臣輔具疏以聞詔守臣擇地于西湖南屏山之麓  
而改葬焉既命工曹往董其役又賜諭祭一十四壇

給供祀田八頃建祠墓下賜額曰發祥表以石坊中  
爲勅命碑亭繕以石垣湖山抱揖寔據佳勝而臣嵩  
承命撰文樹諸神道謹按邵公諱林字懋清一字宗  
茂其先洛陽人也曾祖某徙揚之興化縣祖壽再徙  
杭城父義母彭氏公少而岐嶷長而魁梧儻有大  
志好善敦義楊夫人式克相之嘗夢鳳鳥翔于其庭  
而太皇太后生天順庚辰被選入內庭事憲宗純皇  
帝誕育獻皇及岐惠王雍靖王進封貴妃於是贈公  
爲昭勇將軍錦衣衛指揮使楊爲淑人今上臨御上  
皇太后尊號曰壽安皇太后已而加尊孝惠康肅溫

仁懿順協天佑聖太皇太后進贈公爲奉天朔運推  
誠宣力武臣特進榮祿大夫柱國昌化伯楊皆加贈  
夫人自公高祖王父而下咸賜贈封而官其子姓諸  
從湛恩鴻龐覃被一門於戲盛矣昔有周詩人詠歌  
文王之德之所以成實由於聖母之德行純備有以  
致之也我皇考之德上媲文王太皇太后之懿增光  
京室恒本淵源鍾靈發耀繼聖壬而有作非公與夫  
人協德一慶哉邵喜昌化人寓杭州父林 孝思太  
后父也 太后初入宮爲貴妃生 獻皇帝及岐雍  
二王立屢陞錦衣指揮使嘉靖初尊貴妃爲 皇太



后封喜昌化伯食祿千石與世恭明年卒謚榮和子  
惠嗣伯五年卒無子族人爭嗣 肅皇帝下吏部議  
又令郭勛張璠方獻夫胡世寧李承勛議世寧言  
皇上必欲邵氏嗣封蓋推 皇考獻皇帝之所自出  
于 孝惠皇太后又推 皇太后之所自出于其父  
母邵林楊氏而欲榮富其子孫也不幸林子孫皆絕  
今爭襲者乃係旁枝非林子孫其不當嗣明矣臣恐  
賜彼一代之爵而或亂彼百代之宗誤我 皇上明  
倫之智達孝之仁可不慎乎臣觀江南蘓松諸郡漸  
江諸省未有見侯伯世嗣者喜封伯未逾年遂卒傳

其子憲僅再世而遂絕輔陞指揮弟弼卽天玘三子  
長次二人皆以疾廢其不幸門祚之薄如此蓋亦地  
氣使然故臣愚以爲與之嗣伯則宜考覈倫序若濫  
及旁枝誤及異姓彼弟曰弟彼姪曰姪 太后兄弟  
不得以之爲子父母不得以之爲孫他人富貴而本  
親告絕幽明之間各生嫌隙生者不得安其養死者  
不得歆其祀况門祚薄而禍胎隆恐非邵氏之利莫  
若停其封爵量與恩澤廢卑流遠乃久長之福七年  
春 上特令杰嗣伯八年華外戚封停嗣

封爵考

特進榮祿大夫柱國安平侯謚榮靖方公墓誌

銘

嚴嵩

嘉靖丙午二月四日安平侯方公以疾卒訃聞上爲悼惜遣中官及祠部郎中一員涖其喪命工部營葬事賜諭祭凡十有八壇旣又賜謚榮靖方公在朝廷爲椒房之親恩禮優重宜也公諱銳字廷器世爲應天江寧縣人祖諱阜占籍錦衣衛因家京師考諱永妣陳氏公體貌豐厚爲人敦重質實其始浮湛里中有相者言當大貴公曰吾得爲太平閒民足矣皇帝嗣位九年詔禮部遴選宮嬪於是今皇后以公長女

獻敘錄

卷之三

四

入選初冊立爲德嬪公以恩授錦衣衛鎮撫尋陞正千戶后旣正位中宮公陞都指揮使扈從車駕南狩道拜後軍都督府左都督旣封安平伯復進封安平侯實食祿一千七百三十石追贈曾祖祖考皆如其爵妣皆夫人公起徒步至通侯寵異冠一時在恒情鮮不汰侈溢公獨持以謙撝居常自韜戢上嘗賜之第公取足居息不欲大爲營造服用自常賜外未嘗過求非分由是廷中推賢元配夫人孫氏先卒繼夫人侯氏嗣子一人曰承裕公生于成化丁未十一月十五日得年六十卜以是年三月二十七日甲申葬

公子朝陽關之車營

明威將軍神策衛指揮僉事致仕黃公琮墓誌

銘

公諱琮字進賢世居徽之休寧其先多隱德至考彥  
斌甫妻徐氏女生丈夫子七人家始殷里之識者策  
黃氏必大貴旣而 仁宗昭皇帝臨御冊公女弟爲  
貴妃特遣二中貴人驛召彥斌甫至京授神策衛指  
揮僉事 賜第一區資了恩數至渥七人者公最長  
實侍北行 上召見喜其重厚亦授錦衣衛百戶未  
幾彥斌甫捐館嗣爲神策衛指揮僉事公雅不以貴  
戚自盈年六十卽以官授諸孫惟日端居自適而已

成化初 今上皇帝復冊公長孫女爲 秀懷王妃

公之女適王氏者有甥曰增亦選尚 嘉善長公主

爲駙馬都尉公夫婦尚無恙惟時以手加額曰吾家

藉先世之靈迭被 寵光飛香椒畹恨無德以將之

聞者嘉歎成化癸巳九月十二日忽一疾不起享壽

八十距生洪武甲戌二月七日上聞訃遣使者賜蓋

特恩云公配桂氏南京錦衣衛百戶福之女以慈賢

重戚里封恭人公平生孝友事二親存養終慕如一

日諸弟處江南歲時遺問不絕貴妃從葬 景陵每

時祀北望揮涕不已與人交不蓄中對賓客恂恂執

謙如弟子雖貴富而服食儉素惟好善樂施予不厭  
子孫滿前佳辰令節奉觴稱壽恒諄諄以盛腴爲戒  
敏政嘗與鄉人造公公欸之竟日其貌溫醇其言簡  
而不誇有類乎古之仁人長者竊意其享福有自也  
公沒後一孫女復選爲 徽王妃孫男鏞亦選尚  
嘉祥公主爲駙馬都尉貴戚之盛蓋未有也



固安伯陳公行狀

朱賡

萬曆壬午十一月十四日 聖母仁聖懿安康靜皇  
太后父固安伯陳公卒先是公配張夫人卒得法賻  
葬朝陽關矣至是以 上命啓夫人之窆而合窆焉  
其子嘉言將徵銘鉅公而以某爲鄉人具述公平生  
屬爲狀某辭不敏則曰業聞之 皇太后有成命矣  
不敢辭公諱景行字希哲松鶴其號系出江西建昌  
縣高祖政者以軍功爲百戶世襲徙浙之青田爲浙  
人後調河南安吉衛已又調通州右衛遂家焉政生  
綱綱生銑三世日以 太后貴贈固安伯銑娶某氏

實生公公雖出介冑家然性嗜學不廢鉛槧業弱冠  
爲諸生高等學使至每擊節奇之顧累試不第嘉靖  
辛亥應歲薦鬱不得志將遂謁選天官矣謀之張夫  
人夫人故太子少保禮部尚書文質孫也雅讀書知  
相法謂公曰夫器宏者恥任以圭撮足逸者難局以  
尋常以君而止此安事相也盍少需焉公領之不果  
選戊午 太后選入 裕邸冊爲妃授公錦衣衛正  
千戶丙寅 先皇帝踐祚 太后正位中宮晉公爵  
因安伯食祿千石封張夫人夫人 今上嗣位恭上  
皇太后徵號推恩戚里歲益祿二百石賜扇輿廄

又以 皇子發祥益祿三百廩諸子官爵有差一時  
貴盛無比人謂夫人公藥所言神啓之矣然公性朴茂  
愿恪雖珥貂曳玉赫赫貴顯乎乃廩乎若畏冲乎若  
無所執每遣祀宗廟山陵及持節冊封妃嬪諸大典  
禮必齋戒而後將事欽欽如也上方非時之鮮袞衣  
帶玉兼金上尊歲時所錫予者不一公拜賜輒兢兢  
至不能承每衣一衣則戒諸子曰若輩不覩吾曩日  
青袍乎嘗一食則曰吾藜藿之味猶在口毋相忘也  
閒居必引古人寵辱相踵事以爲炯戒嘗曰吾讀漢  
史至終灌等爲諸寶擇師傅賓客卒之長君少君並

為退讓君子不敢以尊貴驕人此可謂有大造于寶  
氏若輩其慎交遊毋憑托天地而昵匪齊則長有今  
日矣其持盈守謙類如此公年七十而神色甚王卒  
之前旬日猶在朝趨蹌亡恙也一日忽病作乃語諸  
子為我謝 太后吾幸托肺腑微 國厚恩始願不  
及此今不幸先狗馬為太后憂惟 太后強食自護  
若輩仍更日請宮門起居 太后守法循禮毋辱  
國恩吾瞑矣訃聞 太后哭之慟 上為徹樂賜東  
園秘器諸鏐寶幣帛等物無算詔宗伯諭祭十六壇  
司空繕葬仍賜謚贈官給護勅祠額門名已又出二

千金令其家自爲葬費而兩宮聖母中宮妃嬪既滿  
王宮主所賜筐篚載道皆異數云公生正德癸酉七  
月十六日卒年七十張夫人先公十年卒子四人昌  
言錦衣衛都指揮僉事娶儒官王佩女繼娶保定侯  
梁繼璠女嘉言錦衣衛指揮使娶儒官張鏞女善言  
錦衣衛千戶娶壽官宋蘭女名言錦衣衛千戶娶德  
平伯李銘女 孝懿皇后女弟也女長適錦衣衛武  
舉官馬應鵬次卽 皇太后孫十一人承恩錦衣衛  
勳衛娶木衛指揮僉事郭尚文又承爵京衛武學肄  
業勳官娶寧晉伯劉斌女承德錦衣衛千戶娶武舉

官高岐女承宗承廕承嗣承詔承光承椿承順承壽  
俱幼孫女五一適駙馬都尉謝詔孫國子生文衡一  
適太子少保兵部尚書張瓚孫武舉生一麟餘未字  
曾孫四正誼正謨正諫曾孫女三公之爲諸生  
也思吐奇厝畫有四海之心何壯也迨其爵五等彌  
自抑畏恂恂不失故步若無意于世味者斯其處貧  
賤富貴類聞道矣老子云知其榮守其辱爲天下谷  
公豈嘗遵其術耶蓋竊聞 皇太后幽閑貞靜以天  
下養而不與方日誦黃老胎海寓清寧之福有自哉  
有自哉謹次第口語爲狀俟立言君子采焉

武清侯贈太傅安國公謚莊簡李公行狀

王家屏

公諱偉字世奇別號毅齋其先出山西平陽府翼城縣代有顯者未樂初曾大父政從文皇帝靖難軍占籍順天府之灤縣遂爲灤人大父岡父玉俱以公貴贈武清侯母某氏贈夫人公生有異質童時與羣兒嬉里中偶羽衣道士過其前驚駟語人曰此男骨相奇偉異日當大貴位極人臣宜善視之太父聞其語獨喜撫愛異于諸孫常摩其頂曰聞先人言吾上世界德幾數百年後當大發豈在茲乎遂命其名曰

偉從羽衣之言也公家故饒比長受室家漸落人或  
訝羽衣言大謬嘉靖丙午春公夜夢空中雲五色承  
輦旌幢鼓吹導之下直達寢所驚寤舍皇攬衣起猶  
隱隱若車騎紛綸狀鄰舍多與聞者不解何祥其冬  
十一月 聖母慈聖宣文明肅皇太后降里中異香  
彌旬不散司候言后星見燕分直帝城東南其地女  
家多喜自負莫能當之者庚戌秋虜闖近郊畿輔戒  
嚴公始攜家入京居數歲 聖母儼 莊皇帝裕邸  
癸亥誕今 上公乃悟羽衣言與都所夢悉徵客有  
賀公者公輒遜謝此宗社之慶也豈臣下所敢徼福



隆慶改元 莊皇帝推恩戚里授公錦衣衛都指揮  
僉事壬申冊立今 上爲東宮加公中軍都督府都  
督同知是年 上嗣登大寶尊 兩宮聖母爲皇太  
后晉公爵武清伯追贈三代歲食祿千石賜乘肩輿  
尋以昭陵工完及朝宗橋成益祿百五十石戊寅大  
昏禮成推尊上 兩宮聖母徽號恩又益祿百石壬  
午皇子生晉公爵武清侯仍給三代誥命官兩子皆  
都督公蒙受恩眷寵榮無與比而小心畏慎終始如  
一凡 聖駕躬祀南北郊若詣山陵及幸學耕籍必  
命公居守公晝夜部署宿衛士巡警不少懈數奉遣

命告祭太廟及恭請 高皇帝神主配園丘必齋居  
熏沐而後將事一登降陟趨咸質諸禮與士大夫處  
無崇卑務折節爲恭敬然未嘗相干以私以是縉紳  
益雅重之多與之游先後蒙被恩澤所賜第宅莊田  
金幣寶鏹之類種種羨溢而自奉甚約凡狗馬聲伎  
珍綺玩好之具泊然一無所嗜朔望一食蔬素每晨  
起衣冠拜天畢卽望闕遙叩歲時伏臘輒建醮諸寺  
觀爲 聖母今 上祝釐以爲常暇日訓勅諸子倦  
倦以驕奢爲戒歲入租廩下輒指示諸子此顆粒皆  
出國恩宜共惜漏慎無溢費又揭 聖母所賜謙謹

持盈寶翰于庭語諸子曰懿訓昭然爾輩所宜恪守  
不可使後日謂外宗恣橫自吾門始以上虧 聖母  
之德覆車在前深可鑒也諸子奉教命循循一軌于  
禮度下至僕御亦皆斂迹市里無敢縱者又性慈祥  
諱言人過人有善稱譽若不容口問人疾若惻然憐  
之甚于己身嘗手調七劑濟人貧不能葬者給之棺  
椁歲不下數百他所施舍賑卹多不可紀忽遘疾以  
萬曆癸未十二月十三日卒距生正德庚午正月十  
八日享年七十有四訃聞 聖母與 上震悼無已  
爲輟朝一日賻贈加等賜諭祭二十壇勅有司治葬

贈太傅安國公謚莊簡尤爲異數云配王氏封夫人  
子男三長文全次文貴並中軍都督府左都督文全  
婦田氏繼吳氏文貴婦俞氏並封一品夫人次進御  
馬監太監次女適平江伯陳公王謨子錦衣衛正千  
戶胤徵孫男四誠銘誠鉞誠鏞誠錫孫女八長適左  
都督朱公希孝孫錦衣衛指揮同知應梅餘幼文全  
等卜以今年月日奉公柩葬於阜城關八里庄賜地  
墨袞過某列公行事嗚咽請狀某與同里習知公謹  
厚謙挹無戚里富貴態其所稱述皆不虛遂次第其  
語爲狀備鉅公采擇

卷之三終